

## Canchanan di Golf na Aruba

### E Prome Cancha di Golf:



Un "Caddy" na e cancha di Savaneta

E wega di golf a cuminsa na Aruba door di dos ruman, Srs. Warren y Harry Stiehl cu a bin for di Tampico den e cuminsamento di 1930. Tur dos empleadonan di Lago e tempo ey.

Trahando conhuntamente cu Sr. Manuel Viana nan a adkeri un pida tereno banda di Savaneta y cuminsa cu un cancha di golf di nuebe buraco. Un cancha berde di yerba cu tabata cada banda di caminda, relata pa Sr. Berend "Tex" Schelfhorst den e buki The Lago Legend di Sr. Vic Lopez, un ex-empleado di Lago cu a biba den Lago Colony. E tabata situa den un sabana grandi net pazuid di cas di Deoniso Wever, pariba di scol Caiquetio, den e bario cu despues

nan a yama Cura Cabai. Varios di nos hobennan Arubiano a sirbi como "Caddy" pa e golfistanan Mericano.

Sr. Schelfhorst ta conta cu despues di wega di golf nan tabata cana door di Village pa Lago Colony. Cu e village aki e ta referi na e casnan di palo di e tempo ey traha eybanda mes. Pues e no kiermen e village na San Nicolas. Semper tabata dificil pa no stop pa un "par di drink". Ningun hende e tempo ey mester a paga cash. Bo ta firma un papel y bo ta paga un dia despues cu bo cobra salario. E dos barnan cu tabata haci esey tabata: Fanny's Bar y Moose Club. E taxinan tabata riba credito y ta riba dia di pago e taxistanan tabata bay colecta placa na Dining Hall di Lago. E taxinan e tempo ey tabata staciona na un luga di parkeer pariba di Shanghai Bar dilanti di e porta mayor di Lago.

E cancha aki a wordo bandona despues cu uno mas improvisa pariba di dje a wordo traha, poco distancia di e refineria. E nobo tabatin un cancha mas largo y mas tereno cu esun prome. Golf a continua na e sitio aki te mas o menos 1940.

### Cancha na Bubali:



Tempo di e refineria di Eagle, e compania a pone tur facilidad pa e empleadonan, manera canchanan di tennis, un teatro aire liber, un piscina y tambe un cancha di golf den e becindario ambiental. E cancha di golf aki a wordo traha pa e talentoso golfista di Australia, Sr. Jack O'Hara, mas o menos na aña 1937 y tabata wordo usa activamente. E tabata un cancha di sieta buraco pero dos buraco tabata wordo hunga dos biaha. E tabata situa unda e veld di Bubali ta actualmente situa. Segun Percy

Jeandor, e y Sonny Thiel como mucha tabata piki bala pa Srs. Merryweather, Pasnich, Every, Vi Henriquez y hopi mas.

### **Aruba Golf Club:**



Na aña 1940, cu e cancha di golf a sera na Savaneta, Stewart Harrison a bira interesa pa establece un cancha di golf na San Nicolas, na e parti zuidoost di e isla. Esaki a wordo traha na aña 1941, unda ainda e Aruba Golf Club ta situa. Stewart tabata e lider den golf, y a logra obtene asistencia considerablemente for di compania di Lago pa nivela e tereno y construccion, planta yerba, etc.

E club aki a produci hopi bon golfista y tabata un luga cu Lago a pone hopi di su fiestan sea pa su miembronan di gerencia of pa empleadonnan di gobierno. Un club hopi social pa su miembronan mes.

### **Cancha di Tierra del Sol:**



E cancha di Tierra del Sol na Noord a habri oficialmente dia 28 di januari 1995 y ta un cancha di 18 buraco. E ta e unico cancha pa campeonato aki na Aruba. El a wordo diseña pa e arkitecto mundialmente conoci, Sr. Robert Trent Jones Jr. Un bista di lama increibel.

### **Cancha Divi Links:**



E cancha di golf na Divi Links, un di nueve buraco, a wordo diseña pa Karl Litten y Lorie Viola cu a diseña hopi cancha di golf den islanan di Caribe. Esaki a habri dia 31 di October 2004. E ta un cancha cu bunita panorama.

### **Cancha Miniatura di Golf na Arawak:**



Na aña 1965, un cancha miniatura di golf a wordo traha na Arawak Inn na Boulevard, Palm Beach. Esaki como un atraccion turistico. Ta masha hopi hende local y turista tabata bay e luga aki, pa refresca y alabes dal un wega di golf. Tambe e tabatin un restaurant chikito, pero hopi bon. Un luga trankil cu bo por a sinta y disfruta di un ambiente rondona di mata di coco e tempo ey.

### **Cancha Miniatura di Golf na Adventure Golf:**



Na aña 1965, un cancha di golf na Adventure Golf and Fun Park a wordo traha como un parke miniatura di golf. El a wordo sera na aña 2009 hunto cu e Black Hog Saloon y Restaurant Alfredo pega cu e cancha di golf. Esaki tambe tabata un luga trankilo cu bo por a bay dal un drink y come bon cuminda.

***Dufi Kock***

***Escritor y Historiador***

***Savaneta 125-F***

***Tel: 584-1201***

***Cel: 592-9417***

***[dufikock@gmail.com](mailto:dufikock@gmail.com)***

***Lid in de Orde van Oranje Nassau 2006***